

**Zeitschrift:** Il glogn : calender dil pievel : annalas per historia, litteratura e cultura romontscha

**Band:** 12 (1938)

**Artikel:** Igl vegl pot de cumin : studi cultur-historic

**Autor:** Gadola, Guglielm

**DOI:** <https://doi.org/10.5169/seals-881206>

#### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

#### Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

#### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 16.07.2025

**ETH-Bibliothek Zürich, E-Periodica, <https://www.e-periodica.ch>**

# Il vegl pot de cumin

Studi cultur-historic da Dr. Guglielm Gadola

Tgi pomai less era snegar che la posta seigi buc in cummadeivel cundrez? Cunzun ozildi ch'ella tonscha viden el pli davos encarden de nossas valladas. Entras la posta essen nus vegni aschilunsch, che nus astgein dir, ch'ei detti atgnamein neginas distanzas pli. Vulan ins serender zanua e vul ins buc ir a pei, ni pon ins buc ira, sche semettan ins ella posta, crotscha, carr ni schleittra e quella meina nus uras fixas spertamein nua che nus molein. E con lom sesan ins lu aunc en quei carpient? Ins sa schizun seser anavon ni anavos e sch'ei plova ni cuffla, sche han ins tetg suren e perfin scaldau suttent. Fa ei bial'aura e till'ei buca de setel, sch'eis ei tut liber, ed ins gauda stupenta vista e contradas, ch'ins ha bein viu tschienga, mo che fan danovamein legherment e leventan il pertratg e la fantasia. Ed, enqualga confrunti, ch'ins ha stupenta compagnia, ch'ins sa discuorer, ch'igl ei in plascher ed ei semeglia aschi cuort, ch'ins tut surstat de gia esser el liug. Natural, beinduras ston ins era seser sper de quels, ch'han piars il lungatg; sper de quels ch'ins rabetscha buca ora vierv, gnanc sur l'aura buc, mifuns, ch'han adina il burriu anô ed ei semeglia liung ed ins tratga: sch'ins füss mo el liug. Denton tscheu e leu ston ins perstgisar; greva dulur e tristezia turmenta podà il cor tgiembla de tiu vischin, che ti enconuschas buc; malsogna atgna ni d'in car pli dalunsch, in trest cass meina el naven, ei vul rumper il cor ad el e cuosta sforz de mo dir in per plaids. — Mo il postiglion enconuscha ses hospes, dat en tut e dapertut sclariment, ha in bien plaid per tuts; meina segiramein siu cavalut cun egl aviert e maun franc. In bien cundrez la posta! E la buna matrona Confederaziun damonda „moenzaconts raps“, ch'ins paga secapescha avon ch'entrar.

E vul ins star a casa e tonaton dar is, ni forsa era termetter zatgei ad in pli dalunsch, con cummadeivel ei la posta! Spert ina zénsla pupi, sesa davos meisa, scriva tgei che ti vul e ton sco ti vul, cun tenta ni rispli, zugliau en ina copia, clara adressa sissu, serrau e culausi la marca ed en cuort temps sa il car dalunsch tut quei che cuora en casa e magari tut las patahèflas dil vitg, era sch'el stess giudemdem il Schuobalan. E tscheidi ha nies studetgel, il Toni, che studegia latin en ina scola da cheuoragi termess ina brev e scret denter auter, ch'il cuost seigi anzi levs e setels. Immediat ei l'onda Brida seglida da scalas si, e vegn lu giu cun ina puolpa, ina comba digl anugl e cun ina lada e grassa talgia schambun, va per in toc pupi gries de zugliar en, e metta lu aunc vitier sin in'autra buccada puppi: „Car Toni, cheu has Ti zatgei per salar il cor. Nus essan per grazia de Diu tuts sauns. Il bab ha de far ils mauns pleins cun trer en ils de bien e cun pagar ils

deivets. L' Alva ha fatg ierendamaun ina stupenta vadiala. La sterleglia strala dil Tésta vein nus stuiu far giu stiarzas; ella veva magliau en ina guota ded ala; mo ella ha aunc dau o pulitamein carn. Il Martin va bugen a scola e fa pulit. Hagies tema de Diu, seigies pietus ed obedieivels ed empren bein. Ti fas per Tei. Cordials salids da nüs tuts, en particular da Tia mumma e dal Martin, che lai aunc dumandar, sch'ei manegien buc era leu, ch'il Mussolini vegni in di dominè ell'Italia e betti giuadora tut la canaglia politica ed autra? Brida.“ — Aunc ina corda entourn, si l'adressa, mes silla posta e gia l'autra sera ha il Toni giu il legreivel pachet e — gnanc raschieni — cul latin mav'ei silsuenter in bienton meglier. — Cummadeivel il cundrez de posta en tuts risguards!

Mo miu car lectur, quei ei buca stau adina aschia e vegn buc a restar adina quelluisa. Buca mo il cavalut dil pot ed il pupi che nus savein cumprar dal hermer fan ora quei cummadeivel cundrez de posta. Il progress cun buns straduns sur cuolms e vals, las viasfier, che sestorschan ussa tras tuttas nossas pli grondas valladas e lu igl exact aranschament federal, quei tut ha meglierau e perfeczionau nossa posta e fa che tut va speditiv e cummadeivel sin tgei maun, ch'ins vul. E pér igl auto! E mo schei vegnir in di igl eroplan — quei grond utschi — quel vegn lu a far giu nas a tuts, al cavalut, alla viafier, ed era agl auto e vegn era a plascher a tuts. Quel va ad ault, fa donn a negin; quel sa sestorscher aunc meglier che nos politichers e dar suenter a tuts. E lu con spert e cummadeivel! El spargna mantener la via, spargna carr e cavagl e lu magari aunc ils portabrevs. El vegn in di a saver semover e seplaccar sco el vul e comparer cun sias alas avon mintga esch e fenestra e remetter e retscheiver brevs e pachets tut personalmein — che mattauns veglias e giuvnas han aschi bugen!

E lu tgei ventira e consolaziun per quels dellas alps! El stavel de mintga tegia compar'el silmeins ina ga per jamna, porta las nuviallas da mintga vitg — e da quella e tschella — e relatescha engiu co ei stat culla muaglia e caschamen. Bugen dat il signun in barcagl groma ord il curtè al pilot ed in tec pischada per unscher las alas. Camutschs e muntanialas, stai surprise stui all'entschatta, fan cul temps nuota stem pli! E cu il nurser ha de stavlar gl'atun avon la zavrada, sche semetta el ella posta d'eroplan e franc e segir ch'ei vegn lu a muncar ni tschanc ni tschut ni tgigisch ni burbaisch tiella zavrada. — Mo nus lein calar, nus vegnessen tier negina fin cul descriver tut las sviluppaziuns pusseivlas della posta.

## La posta en general

Il plaid posta vegn buca dal tudestg, sco in scheniu ha sefitgau inaga, mo bein dal latin medieval „posta“ (scursaniu ord statio e „posita“). „Posta“ indicava in liug nua ch'ins postava e midava, nua che postiglions e cavals fuvan postai. Il medem secomport' ei cugl origin dil plaid militar „posta“, in liug, nua che schuldada ei „postada“ per la guardia.

En negina tiara dil mund ei il trafic de posta aschi intensivs, sco en Svizzera. Per circa 900 habitonts dat ei in biro de posta, en Germania pér per 1570, en Frontscha per 2800, ell'Austria per 2900, ell'Italia per 3300 habitonts. Intragliauter obtegn oz in svizzer 150 brevs ni cartas ad onn, senza quintar ils buordis catalogs digl Jelmoli e consorts; in Schuob mo 100, in Franzos mo 90, in Talian 40 ed in Russ 10.

Scu la posta, dat ei strusch ina instituziun de trafic e comerci, ch' ei s'ignivada aschi profund ella veta dils pievels. Naven dils anno 70 ei il postesser sesviluppaus enormamein — e quei grazia alla megliera organisaziun. Anno 1850 ein vegnidas tarmessas en Svizzera 12 milliuns brevs e cartas, anno 1912 262,5 milliuns. Ed artechels stampai vegn ei tarmess oz tondanavon entuorn, perfin siden tier nus, che nossas femnas han nuota de basegns pli de far uadels per metter fiug en pegna e platta. 1852 dev' ei en Svizzera 2803 emploiai de posta, anno 1912 16 131 ed oz segiramein ina détga troppa depli.

La posta ei ina veglia instituziun, fetg veglia!

En China ei la posta gia stada instituida da temps antics enneu; dapertut en quei immens imperi dev'ei vias e straduns, canalisaziuns e staziuns. Il medem vala pils Persers, Aegypters e Romans. Quella instituziun fuva denton creada all' entschatta per motivs purmein officials ed ei astgava buca vegnir fatg diever dalla posta da persunas privatas. En las provinzias ed en tiaras subditas agl imperi roman, dev'ei gia in' entira reit de cuorsas postallas, e staziuns dapertut, nua ch'ils „posts“ cun lur cavals fuvan postai per transportar alla proxima staziun annunzias, avis e decrets. Dals grecs e romans ein vegnidas tochen sin nus e semantenidas brevs en prosa e poesia. La fuorma exteriura dellas brevs fuva fetg differenta; da temps antics vegneva ei scret sin ina tabla de lenn, sin pials, pli tard vegneva lu duvrau il fin pupi aegyptian, ch'ins schizun parfumava, ch'ins rulav'en bein e scoiauda epi serava cun in pindèl.

Sesviluppada ei oravon tut la posta dal temps dils imperaturs romans Augustus e Hadrian; enten gliez temps mava la posta tochen ora els pli allontanai encardens digl imperi. Ord il temps digl imperi roman havein nus bia reglements e statuts, che reglementan il survetsch postal detagliadamein. Per ex. vegn ei perscret exactamein, cons cavals metter sut, tgei bunamana stoppi vegnir dada al postiglion, con spert la posta stoppi ira, co l'iseglia stoppi vegnir mantenida ect.

Ei deva de treis sorts postas: l'ordinaria, posta de bos ni méls, la posta rapida per hospes de prescha, la posta de cavals, e la tiarza, posta de brevs e pachets, quella de curiers. Gia da gliez temps dev'ei postenents, inspecturs de posta ed auters emploiai. Il beinordinau e relativamein spert survetsch de posta cumpegliava da lezzas uras pli che 100 provinzias romanis, che sextendevan da Gallia en Britania, tochen ell'Africa ed Asia.

Duront l'invasiun dils pievels selvadis germanas ei igl imperi roman jus a frusta ed era la posta. Dapi lu udin nus nuot de postas entochen el temps de Carli il Grond. Quel ha sedau gronda breigia de puspei metter en pei il survetsch de posta, schiglioc eis ei daventau pauc el temps miez per la meglieraziun dils cundrezs de traffic e commerci. Sulettamein las claustras ed ils uestgius sentevan il basegns de star ina cun l'autra — sco era cun Roma — en contact e relaziuns; denter ellas sesurvevan ei de pelegrins e mugns per pots. Pli tard han allura ils pots dils marcaus giugau ina impurtonta rolla. En Germania er'ei la familia de Taxis, ch' ha promoviu considerablamein la posta. Anno 1516 ha Fracestg de Taxis, en sia qualitat de capitani postal digl imperi, endrizau in survetsch de posta regular denter Brüssel e Viena e vid quel, lateralmein ein aunc autras cuorsas de posta seligiadas.

En Svizzera havevan las regenzas dil 15avel tschentaner lur agens curiers („Läufer“), ch'astgavan denton spedir mo caussas officialas e mo de rar inaga zatgei privat. Brevs e correspondenza privata vegneva dada il pli savens cun hermès ni cun mistergners vagants. Cun la carschen dil commerci ein era plaun a plaun las postas privatas s'installadas. Quellas procuravan la spediziun de brevs e pachets ord atgna iniziativa ed han fatg ordlunder in mistregn. El 17avel tschentaner dev'ei a Turitg, Bern, Basel, S. Gagl e Schaffusa beinordinai instituts de posta. Quels vegnevan per part menai e dirigi da societads mercantilas e d'impressaris privats — nua ch'il stadi veva de ver en il nas nuot ed è buca de pagar pensiuns...!

Enconuschenta fuv'oravontut la familia Fischer, che vev'en ses mauns la posta bernesa. Pli tard entochen 1848 — cun excepziun d'in cuort temps duront la Helvetica — vevan la plipart dils cantuns svizzers lur atgnas administraziuns de posta; Schaffusa veva schau vi la posta alla familiä tudestga de Thurn e Taxis. Ei deva lu 25 differentas administraziuns postalas, che vevan lur agens contracts cun las postas dils stadis vischins, lur agens prezis e taxas. Entras la constituziun federala de 1848 ei gl'entir menaschi postal vegnius en mauns della Confederaziun. Quei ha giu siu bien e siu schliet! Cun quella caschun astg' ins bein exprimer il pertratg, ch'il stadi duvravi (e duvrass aunc oz!) nuota laguoter tut las fatschentas, ch'era privats savessen far e che quels fagessen franc meglier ch'il stadi. Exempels persuenter maunc' ei franc buc. Deno la posta — ch'ei en Svizzera memia cara — fan tut las fatschentas dil stadi anavos e fetg lu; patertgeien mo vid la viafier federala ed autras. Quei vegn dal reminent era dacheu, che buc il stadi sa pli cumandar sin ses survients, ils emploiai, mobein quels sil stadi! Nus essan teoreticamein aunc buc in stadi socialistic, practicamein essan nus dai bravamein ella buglia socialistica.

In dils pli gronds progress dil postesser — aschia dian biars — seigi stau l'unificaziun ed il bass prezi dellas taxas postalas de brevs e pachets, senza

risguard sin la distanza. Ch'ei seigi denton gest, ch'ina brev termessa da Selva a Cuera cuosti exact il medem, sco quella che va da Selva a Basel, gliez sa negin far crer nossa glieud! Gl'emprem han las postas inglesas introduciu quellas taxas uniformas e suenter tut las otras. Lu han pliras tiaras fatg contract denter ellas pertenent taxas unitaras, aschia che la posta, sin camp internazional, ei veginida bia pli bienmarcau. Internazional aunc pli fin, funcionescha la posta dapi la fundaziun dell' "Uniun postala mundial." Quell'ei veginida fundada 1874 a Bern ed ha leu sia administraziun e direcziun centrala. Mo paucs han in' idea della grondiusa organisaziun che quella instituziun ha creau. Eis ei per ex. buca zatgei grondius, che nus savein temetter oz ina carta per 20 raps el pli allontanau encarden dell'America, e ch'ella vegin remessa leu els vers mauns? Tier quella relativamein grondiusa sviluppauiun della posta han era las viasfier, ils gronds vapurs ed igl ero-plan gidau! Era entras invenziuns technicas de posta, sco per ex. 1653 l'invenziun della marca postala (entras Velayer) e lu las cuviartas dellas brevs (1830) e la carta postala (1869), han gidau il lur tier ina tala perfecziun. — Dal telefon e telegraf lein nus gnanc far menziun en quei connex — ins vegness tier negina fin!

## Il vegl pot de cumin

Quei ch' interessescha principalmein nus ei la damonda: Tgei relaziuns de posta havevan nus pli baul en nossa tiara? Gie, nus lein localisar la damonda aunc pli prezis e dumandar: Co stev'ei avon onns culla posta tier nus en Surselva romontscha? Sur quei interessant factur cultural ei de miu saver aunc mai veginu scret zatgei! Ei savess pia esser d' interess pils lecturs dil Glogn d'udir enqual caussa sur la posta ed ils pots de nos pardavons. —

Da buob vevan nus de Mustér mintga bieni pil di de cumin in immens plascher! La sera avon mavan nus sin curtin cumin e gidavan „il Stiaffen della claustra“ a metter la buora en canorta, sinaquei che tut seigi pinau pil di sissu, pil di dil grond evenement. Gia quei di vesevan ins il salter en siu mantî tgietschen e verd a mond cun majestad tras il vitg. E pér il di de cumin sez! Gliez di vevan nus in cunfar cun contemplar ina partida de quels costumai: il stab de cumin. Ch'il Mistral pertassi in mantî tgietschen-scarlata, quei capevan nus senza ch'enzatgi vess stuiu declarar! Che siu stab vessi in „fiffer“ e dus „tamburs“, quei capevan nus aunc meglier! Mo pertgei il „läufer“ cun sia pica fusi cheu e massi ordavon, fagend smanis cun sia pica en fuorma de lontscha, sco sch'el stuess fular via tras l'aria — gliez havein nus mai capiu.

Quei ufficial porta aunc oz frestgamein sia pica, ei vestgius en verd e tgietschen — las colurs de nies cumin, — che sebrattan giu sin combas, bratscha e spatlas ed ha si ina capiala de treis pézs. Osum l'asta sper la pica er' ei,

sch'jeu sbagliel buc, fermau si in bi pindèl tgietschen e verd. El mava, e va aunc oz ordavon, cura ch'ils umens tilan sin cumin. Quella preferenza ed ensumma sia existenza hodierna, muossa clar e bein, che quei ufficial dil stab veva pli baul in'impurtonza, ch'era segiramein pli gronda che quella dil fiffer e dils dus schumbraders.

Il num „läufer“ (rom. san ins bein dir: curier!), di ch'ei retracti cheu dil vegl pot ufficial de cumin, che vegneva elegius dals umens de cumin e che veva l'obligaziun de spedir e metter a mauns las scartiras officialas, confidadas ad el dal Mistral, dals mediaturi e dals derschaders. Igl ei buca excaus, ch'il curier dil cumin della Cadi fuva era el medem temps il curier della Ligia Grischa (pli tard ei quei il cass!) e ch'el ei per quei motiv semantenuis sco member dil stab de cumin della Cadi entochen sil di ded oz, ferton ch'ils auters cumins en Surselva enconuschan buc in tal — ed han forsa era mai encunaschiu.

All'entschatta veva quei curier, sco era en auters loghens e marcaus, caracter dil tuttafatg official. Ei para denton, ch'el hagi gia bien e baul era procurau la spediziun de brevs ed artechels postals de caracter privat, e ch'il cumin hagi lu el decuors dil temps sez priu enta maun igl entir menaschi de posta naven da Cuera entochen Tujetsch e Medel. Quei fatg semuossa clar e bein ord in document dil cumin della Cadi digl onn 1754, che jeu vi publicar cheu verbalmein, essend ch'el ei buca mo gl'emprem de quellas vards, mobein era in intressant document cultural, che mereta tutt'attenziun ed ina cuorta interpretazion:

### „Uorden da vart il pott.

Emprimera gada dei scadin legalmein constituiu pot esser da buna fama, e buns daportamens, a consequentamein nua che el sateng si ni cun plaids ni cun faigs dar scandal ad enzitgi, specialmeing aber buca rasar ora novadats u nuviallas che el auda per vias, a che pudessen da don ailg laud et honur da Diu, et empermer cristgiaun, essent che el coutras safigies participeivels da tut quei mal che dariva ora da quei.

2º Sto el esser fideivels a da bien quitau, sinaquei che in astgi safidar dad el, e leu suenter tut quei che agli ven consignau ei seigi brevs ner auter da purtar, tener en bien govern et en siu liug consigniar, per not che ei vegni bucca lavagau, ner autra mess a piarder, u crodi enten mauns a personas che han da quei nuotta d'haver marveiglias. Simigliontamein dei el cura che agli ven dau cumissiuns a bucca, quei fideivlameing cunderser, aber buca dir ora ad autra gliout.

3º Dei el habitar en Muster, a cunderscher il siu uffezi, era senza special basens bucca substituir enzatgi auter per el ad eung meins da aigna autoritat consigniar l'anzena della Ligia ad auters, essent che allura, el per tut quei che auters surpassassen, ven a stue esser responsabels.

4º Ei sia obligatiun da scadina domeingia per il on ora tems d'unviern, quei ei dil Advent entochen Pastgias allas 7, tems da stad, quei ei da Pastgias tochen il novenber allas 8 uras ira navent da Mustee e continuari il viadi en maniera tala che el senza munca il gliendisdis sera a bun hora rivi en Quera, et era eung gliez di possi las brefs, et tut auter consigniar en siu liug, nua che ei auda.

5º Per quella fin dei el las brefs a tut quei che ei da termeter la domengia demeun, ne schon sonda sera rabbitschar ensemes, parte tier particolars, parte en casa Cumin nuache tuttas brefs da cau, Tuietsch, a Medel cuminameing duessen vignir messas, parte aber ella Principalla Clastra, tier sia Sabienscha Sigr. Mistral Regent, Pundtschribier, e scrivont dil Cumin sche ei habiteschen cau, ne en otras vischnauncas vid il landstros.

6º Simigliontameing duess el giu Sonvig, Trun, Tavanasa, Ruaun, Gliont, Schlovein, Sagong, Lax, Flemm ect. numnar ina casa vid il landstros nua che las brefs enten ina casseta ner schiglioc duessen esser paregiadas, sinaquei che el bein gleitti sapi prender a bucca stopi sataner si.

7º En Cuera dei el sco sura ei deg ilg glendisdis sera consigniar las brefs nua che ellas auden, a cun flis procurar che ei davanti negin disuorden entras scumiar giu las scartiras il qual pertut ei bein d'observar, suenter pia da quei che el tut agli consignau ven a ver rabbitschau ensemes, e conderschiu quei che basens fà dei el il mardis a miez di sametter sin viadi per turnar a Muster a talmein fastginar che: rasalvont forza da Diu: el mesjarma sera, la stad, a giefgia a miez di gl'unviern, ordinatameing arivi.

8º Per quella fin dei el per viadi nigliu sataner si senza basens e piarder il tems cun cincia beiber e giugar et eung meins ira starschon brefs ne auter che gli ven consignau da purtar, schar scher per las casas entuorn, a conceder che auters visiteschan, sonder el returna puspei els logs surnumnai portar e consignia nua che ei auda.

9º Per sort che el duess cau Muster u giu Cuera, ne sin viadi per fi- cientes specialas a da gron momen vignir antardaus per ina ura ner duos, sche dei el nuota ton meins empruar da quei per viadi cunschar ent et arivar ton a Cuera sco ciou si, a tems et uras sco sura ei nomnau.

10º L'anzena della Ligia dei ell adina ton per sia aigna sigerezia sco da tut quei che el ha cun el, purtar adaviert dischentameing pendida.

Per sia pagaglia po el dumendar, a dei gli vigni dau da tuts quels che cunvegnien bucca particularmein cun el per ina bref de Cuera entochen Mustee, ne da Mustee entochen Cuera bl. 2. itm. per otras caussas che gli vegnien consigniadas da portar 5 bl. la crena.

Dau a Mustee ils 6 da Junij 1754

Thomas Bundi Landschr.“

Ord il sura document san ins prender il sequent pertuccond il menaschi de posta de gliez temps:

1. Igl uffeci de pot ei ina caussa seriusa e perquei sto igl um che ha surpriu quel esser „da buna fama“, cun in plaid: in um endretg, solid e negina paterliera.

2. Ins sto saver sefidar sin el en tut e dapertut, essend el (aunc pli che oz) ina persuna de confidanza oravon tut.

3. Siu uffeci ei aschi impurtonts, ch'el sto sez far la laver e quei ella capitala dil cumin. „L'enzenna della Ligia“, ch'el purtava il pli probabel vid sia mondura, sto el sur tut tener en honour e consignar a negin.

4 e 5. Siu survetsch ei perscrets exactamein e quel sto el tener en cun tutta conscienciusadad. Ord punct 5 seresult'ei, ch'el ei oravon tut igl ufficial dellas autoritads de cumin.

6. Quest punct muossa era ch'el ei el medem temps pot pigl entir tratg della Ligia Grischa e ch'el accepta era posta privata.

7, 8, e 9. Quels paragrafs punctueschan e perscrivan aunc pli detagliadamein siu survetsch; quei ch'el dueigi far e schar star.

10. En quest ultim punct vegn aunc punctuau ina ga, ch'el seigi persuna ufficiala della Ligia ed hagi de sedeportar sco tala.

Il pugn pecuniar ei intressants! El ha ina certa libertad de secunvegnir privatim cun sias postas, mo da l'autra vard tschenta il cumin tuttina si ina directiva taxala; ina bref da Cuera a Mustér e viceversa cuosta 2 bluzchers; pachets 5 bl. la crena (ina crena ei circa in killo).

Co il pot de cumin fuva armaus ed uniformaus savein nus buca dir exact, deno ch'el purtavi l'enzenna della Ligia; el 18avel tschentaner vegn el probabel aunc ad haver purtau la mondura, sco'l „läufer“ de cumin porta aunc oz. Entochen la fin dil 18avel s. ha el fatg siu survetsch a pei, senza cavagl. El „Rhätischer Staatskalender“ de 1789 anflein nus la notizia: „... Kommt an: Dienstag Morgens: Alle Provinzial Fussboten, von Tisentis, logirt bei Frau Wagmeister Loretz. Von Ilanz etc... Gehen ab: Mittwoch. Die Provinzialfussboten um 1 Uhr.“

Exactamein con ditg el ei jus mo a pei da Cuera a Mustér ina gada ad jamna savein nus buc, mo schi presapauc bein.

Anno 1802 ha la „Republieca Helvetica“ tratg a sesezza il menaschi de posta. Quei vesein nus ord ina brev officiala dil statthalter della regenza dil „Cantun Rezia“ G. Gengel, adressada „An den Unterstathalter des Distrikts der Rheinquellen, Bürger Caprez in Truns.“ (Cuera, ils 26 de schaner 1802; arch. de Cumin 46) — Caprez dueigi haver quitau, ch'igl anteriuur ni in auter pot continueschi cun siu survetsch sco tochen dacheu; el vegni er a far pass, che la duana alla Punt (Rehanau) vegni dismessa pil pot.

Sin quei ha ei dau dispetta denter la regenza ed il Cumin della Cadi, ed ord la correspondenza de quella (che sesanfla egl archiv de cumin) vesein nus, ch'il pot stueva dal temps ch'el mava aunc a pei, pagar negina duana alla Punt.

„Burger Präsident und Burger Assesoren!

Ob der Dissentiser bott ehe wir Reichenau hatten, zollfrey gehalten worden seije, lassen dahin gestellt seijn. —

Wäre es aber demme also, wurde es eine pure begunstigung gewesen seijn, welche zu ansprache auf die Zukunft gar kein Recht giebt. — Die begunstigung wäre anbeij desto leichter gefallen als der Dissentiser bott ehehin nur allein passierte, ohne einige Fuhr eine geraume zeit fuhrt er immer ein Pferdt mit einem geladenen Wagen mit sich. Seine Fuhr ist also, wie jedes anderen dem zoll unterworfen und wir wissen nicht, mit welchem auch nur Schatten von Grund, er eine Ausnahme begehren mag, sonderheitlich da diejenigen fur welche er die Waaren liefert, ihme um alles bezahlen. — Sie werden daher Burger Präsident und Burger Assesoren gerechtesten sehen: das wir uns von der Beziehung des Zolls von dissentiser bott nicht abhalten lassen können, indemme wir wenn er, oder wer immer fur ihne ansprache auf die Enthebung machen sollte, alles auf unpartekompetirendes Recht abschlagen...“

(suttascret) Bavier

Ord l'ulteriura correspondenza en quei cass de dretg, seresulta ei, ch'il pot de cumin eri libers de duana a Rehanau per sia persuna, buc aber ussa, ch'el seigi fitaus cun carr e cavagl e gronda carga. (v. Arch. d. cumin nr. 50, 2as annexas)

Dapi 1802 il nov. entochen 1841 cursescha il pot de cumin in a gada per jamna. El arriva il mardis avon miezdi a Cuera e parta puspei quei di suenter miezdi per la Surselva (v. Brev, arch. d. C. nr. 168 ed ils „Graubündner-Staats-Kalender 1802-1841).

Dapi circa 1800 pia, ha il pot de cumin gl'emprem cavagl de bast e silsuenter carr e cavagl per siu survetsch.

Cun 1803 e silsuenter ha il cantun Grischun en relaziun culs cumins enta maun il menaschi de posta. Mo all'entschatta funczionescha la caussa bucaton bein en tut e dapertut. Per exempl, il pot de cumin fuva obligaus de rabbitschar la posta per las valladas Tujetsch e Medel mo tochen Mustér, e navan da leu stuevan ussa quellas vischnauncas sezzas procurar pigl ulterioriur transport; ins sappi buca sfurzar il pot de cumin de far quei, num che las duas vischnauncas indemniseschien sezzas il pot, ni surdettien quei survetsch ad in'autra persuna dad els commissionada. (v. Brev della reg. dils 6 de matg 1822 al Mistral della Cadi. A. nr. 513) Ord quella brev san ins era prender, che quei pauc che vegneva a Mustér per Tujetsch e Medel, vegneva mintgamai occasionalmein priu navan da Mustér dad in u l'auter vischin, cu'l vegneva neudo ella capitala. — Da quellas uras (1820) era ei aunc ton pauc trafic e commerci cugl „exterior“, ch'ei fageva detguonda quelluisa!

D'in temps par'ei era, che las brevs dil cumin della Cadi vegnevan zavradas pér a Glion e buca gia a Cuera, mo il cumin recloma: „Sgr. Landa

regend propona ch'ei seigi a riguard il Pott vigniu dau en risposta ch'in garegi che las Breffs dil Cumin della Cadi vegnien dil nies agien Pott spin-dradas ord il Birro de Cuera e bucca per si a Glion essent ch'il Cuost e spesas [vegnien augmentadas ei surschau a Sia Sab. de scriver a siu bein manegiar.“ (v. Protocoll de Cumin, 1833 ils 3 de fevrer.)

Els anno 40 sefa ei gia valer, ch'il cuors de posta Mustér-Cuera, ina gada ad jamna, ei buca pli sufficient. Per quei motiv instanziescha il Mistral a Cuera sco suonda:“

„Suenter de quei mett'il Sgr. Mistral avon la gronda necessitat che de di en di vegni pli urgenta che la posta de nies Cumin, momi duas gadas ell'jamna, et che dus frars de Somvitg, Pieder et Sep Maria Cajacob hagien serecomendau tier el de proponer e suplicar in Lud. Oberkeit ch'el recamondi els tier in bein lud. Postamt sco tals che veglien suprender de spidir las brefs e pacets tras nies Cumin duas gadas ell'jamna.

Suenter haver viu en generalmein ils avantatgs che suondassen per nies Cumin entras drizar en che la posta massi duas gadas ell'jamna eis ei vigniu concludiu de instanziar avon il Lud. Postamt, ch'il Pott spideschi las brefs e pacets stat mo ina gada duas gadas tras nies Cumin, e ch'in Lud. Postamt legi or in bien Pott, e per auter laschig sura de leger ora in tal senza recomendaziuns per in u lauter.“

(v. Protocoll de C. . Mustér, ils 25 de nov. 1835)

## Tgi fageva pot de cumín?

Ils emprems pots de cumin hai jeu buca saviu eruir; lur numis ein svani cun els. — Da 1821 entochen 1831 han ils dus Gigers de Zignau, Rest Mathias e Rest Luregn fatg ils pots de cumin. Els mavan ina gada ad jamna tochen Cuera cun cavagl de bast.

Cura ch'ils Gigers han demissionau 1831, han els recommandau lur parents Demont de Darvella, mo la suprastanza de cumin ha surdau quei uffeci a personavels de Compadials, probabel als Cajacobs. (Ord ina notizia de P. B. Berther ella bibl. rom. M., culla remarca: raquintau da Tumaisch Quinter Darvella, igl emprem de matg 1921)

Il far pot fuva da lezzas uras buca hanau ed è buc aschi segir sco ozildi! 1805 per ex., ei il pot de cumin vegnius attaccaus dad in scarvon de Compadials ed ha survegniui ieli de costas de quel. Mo il cantun ha fatg pass rigurus encounter quei herox ed ha protegiu il giuvnal de Mercur. Il rabiau attaccader ha obtenu in salau castitg, schon è perquei ch'el ha giu la galliardia de taccar in personal, che purtava l'enzenna della Ligia.} (Mira: Brev dils 26 de nov. 1805. A. d. C. nr. 290)

Naven da 1831 entochen 1850 han dus frars de Compadials, Pieder Paul Cajacob e Toni, numnaus „Toni Pot“ compleniu quella missiun. Els vevan

plirs cavals, e menavan era rauba per privats. Ina gada ad jamna mavan ei adina a Cuera per la posta. Ins raquenta ch'els schavien vi ils cavals a tscheins duront la stad ad Ursera e salvavan mo in, che fageva la posta a Cuera. La pagaglia era miserabla; il pli schamper pot de vischerna ha oz ina pagaglia, che porta il treidubel de quella dil pot de cumin de lezzas uras!

La posta de brevs devan els giu en mintga vitg, mo quella vegneva buca repartida sco oz; mintgin mava sez sin posta per mirar, sch'el vessi zatgei Il pot pertava ina capiala nera che tarlischava buca pauc e che veva si pindels. El vevi era e duvravi enqualga in tgiern postal de mèsch, per far de saver, ch'el seigi en pei, vegnend ella vischinonza dils Jerichos romontschs — Ils Cajacobs seigien mai i cun cavagl de bast, sco lur antecessurs; els mavien adina cun carr de laitras. (Raquintau da Julia Wieland a P. B. Berther, mscr. ella bibl. rom. M.)

Remarcabel eis ei, ch'il pot della Cadi veva aunc quei temps la libertad ded el sez secunvegnir per part cun sia „clientella“. Quei documentescha la suondonta notizia, ch'jeu hai traplau el „Grischun Romonsch“ emprema gassetta sursilvana: „Tenor convignentscha della redacziun dil Gr. Rom. cun il Bot della Cadi, duei quel buc puder domondar e trer en dals abonnents pli che 40 kr. porto per il Gr. Rom. dal mars 1837 entochen il mars 1838 (es-sent che per ils onns avon existeva nagina cunvignentscha cun il Bot.“ (v. Gr. Rom. 1838, nr. 44 e 45).

Tgei vetas e murdrias la via vedra de Surselva purscheva a glieud e tiers, vegnin nus a mussar cheusut. In emperneivel uffeci sco'ls biars pots han oz, vean quels de lezzas uras franc buc!

## Il svilup delle cuorsas postalas

Da 1750 entochen 1841 constatein nus, ch'il pot de cumin mavi mo in a gada per jamna a Cuera per la posta; gl'emprem a pei, tochen circa 1800, suenter cun cavagl de bast e dapi 1820 cun carr e cavagl.

Dapi 1841 entochen 1850 va el duas gadas per jamna tocca Cuera. In urari ord il Graub.-Staats Kalender metta:

Arrivada: mardis allas 8 della damaun.

Partida: mardis allas 4 de suenter miezdi.

Arrivada: venderdis allas 3 suenter miezdi.

Partida: sonda allas 9 della damaun.

Quei urari resta quasi exact il medem da 1841-1850. Naven da 1850-1855 cursescha la posta Cuera-Mustér treis gadas ad jamna.

Arrivada a Cuera della posta sursilvana:

Mardis allas 8 della sera

Gievia allas 8 della sera

Sonda allas 8 della sera

## Partida da Cuera tochen Trun:

Mardis allas 5 della damaun

Gievia " 5 " "

Sonda " 5 " "

Il fevrer 1849 annunzia igl „Amitg dil Pievel“: „Nossa commissiun postala ha quels dis survegniu la concessiun da Bern de ranschar en per la Partura ina posta cun crotscha tochen Trun. Sco ins auda ord bunas fontaunas pon ins haver speronza de poder ir „egl Avrel“ da Cuera tochen Trun en crotscha.“ (v. A. d. P. 1849 nr. 7.)

E la vigielgia avon il grond evenement: „Mardis proxim, ils 31 de Juli, vegn finalmein la ditg spetgada metamorfosa dil pot della Cadi ad haver liug; nus lein perquei haver avisau ils habitonts dellas spondas de Sursaissa, Uors e Breil, de buca pegliar tema, sch'els vesan quei di buc a seruschnond pli in schnec grischun, sunder enstagl quel sgolond l'aurora federala cun dus cavals.“ (v. A. d. P. 1849, nr. 30.)

Ils 2 d'uost 1849, ei per l'emprema gada la posta federala, posta de crotscha, arrivada en Surselva. Quei evenement historic porta la medema gasetta cun veseivel plascher: „Dal Rhein anteriur. Ils 2 d'Uost, 20 minutus suenter miez di, ei la posta federala pell'emprima gada arrivada sil Grütli grischun a Trun, e leu vegnida retscharta cun ina solemna salvia de murtès. Tgei contrast, tgei differenza denter il vegl pot della Cadi, Dieus hagi sia olma, e la nova posta! Tgi che ha giu la ventira de ver aunc cun tgei grazia ch'il niev postillon e conducteur seseva sil boc della crotscha, d'observar con bein culaus et ornaus ch'el era en sia uniforma, e cun tgei spertadat vapurica ch'el crotschava, ferton ch'el ha sut il venerabel ischi de s. Onna intonau in'eclatant'aria sin siu tgern postal, gie tgi che ha viu quela legreivla comparsa, quel vess buc enconoschiu pli il curier sursilvan cun siu „nur immer langsam voran dass der Oberländerbot nachkommen kann.“ Quella remarcabla metamorfosa ne midada dess a nus materia tier ina humoristica comparaziun denter il vegl et il niev indrez de posta, mo in vegl proverbi di: de mortuis nil nisi bene, dals morts duei ins buca plidar auter che dal bien; perquei lein nus quescher, tonpli ch'il curier permiert ha tras sia gronda surventscheivladat e siu exellent humor acquistau general laud. Tras quei niev indrez de posta survegn denton la capitala della Cadi sias brevs e gassetas grad 20 uras avon ch'entruras.“ (v. A. d. P. 1849, nr. 32)

Il progress ei buca mal, sco nus vesein, mo en cuort para ei gia, ch'era la posta federala hagi sias mendas, e ch'era ella funczioneschi buca dal pli spert e cuntentond. Dus onns pli tard recloma igl „A. d. P.“, sco suonda: „Per quels, che han daditg selamentau sur nies schlendrian de posta, cul qual ins arriva da Cuera a Mustér en 15 uras, ferton ch'ins va en 12 uras a pei, savein nus rapportar la legreivla nova, ch'il magistrat della Cadi hagi unanimamein concludiu de procurar, ch'ei vegni in meglier uorden postal.“ (v. A. d. P. nr. 3, 1851)

Malgrad la vegnida della posta federala, ei il pot de cumin para buca vegnius dismess tut agrad giu, sco quei ch'ins sa prender ord in protocoll della dertgira de cumin, dils diesch de schaner 1849: „Mont tier il salari dil pott ei dal Lud. Oberkeit vegniu decretau da dar ad el 12 f. (flurins!) per bieni, entochen temps e circumstanzias semidan, cun la condizion aber, ch'el seigi lura obligaus de portar tutas brefs officialas per nuot...“ (v. Protocoll de C. nr. 8)

La cruna dil progress pertenent il svilup dellas cuorsas postalas munta igl onn 1855, nua che la posta Cuera-Mustér ei daventada quotidiana. — Ella arriva di per di a Cuera las 7 e 25 la sera e parta per la Surselva mintga damaun allas 5.

Mo la davosa etappa maunca aunc! La posta de crotscha vegn mo tochen Trun, essend la via nova buc aunc finida tochen si Mustér; perquei funcionescha aunc adina „il pot de cumin“, da Trun a Mustér. Mo buca per ditg. Ils 30 d'october 1857, arriva l'emprema crotscha, ch'ins ha viu zacu, ella capitala de cumin. Secapescha che quei ei buca stau in pign evenement. La Nova Gas. Rom. rapporta: „Ils 30 dil vargau ei il lud. Cussegl pign arriavaus ella residenza della Cadi cull'emprema crotscha, ch'in ha viu leu. Quei ei stau ina tschavera pils affons, che vevan aunc mai viu enzitgei semigliont. Els ein semess ella crotscha ed in ha giu breigia de rabbitschar or'els; las buobas han denton voliu esser engrazieivlas per quei legerment ed han ornau la crotscha cun matgs e guirlandas. (v. Nova Gas. Rom. nr. 45, 1857) La regenza veva ton sco fulau via per la crotscha e perquei va ei mo paucs dis pli, ch'era la posta astga ughegiar il davos stentus tratg de Cuera a Mustér, q. v. d. da Trun a Mustér. Era quest evenement historic ha il redactur della Romontscha scalprau en sias annalas sursilvanas: „Mustér. La posta de crotscha, che vegneva tochen ussa mo tochen Trun, ei oz arriavada cheu pell'emprema gada e vegniða benevetada cun salvias de murtès. Ordavon galopavan dus famus cavaliers, in alla Parisera ed in alla Grischuna, e suenter la posta trottava in cavalott cul scharabanc dil magistrat e sut la melodia:

Nur immer langsam voran,  
Damit der Gieraу nachkommen kann.“ (v. N. Gas. Rom., nr. 1, 1858)

Mo quels onns ha ei era giu num metter neu novs officials de posta. Aschia fa il cussegl federal gia 1849 las sequentas elecziuns per ils differents circuits: „Pils sutuffecis de posta... a Trun: sgr. F. A. Decurtins, cun 80 frs. ad onn; A Glion, sgr. Simonet de Zillis cuñ 100 frs. paga. (v. A. d. P. 1849, nr. 40)

Mo la caussa vegn pli e pli perfetga e grondiusa: „Cugl emprem schaner 1850 vegnan tuttas vischnauncas de nies cantun a survegnir bots sin quint della Confederaziun.“ (v. A. d. P. 1849, nr. 40 e 45)

Aschia davent'ei pusseivel, ch'era vitgs e vischnauncas „giud via“ survegnan lur posta quotidiana.

---

## Mo enzaconts exempels!

Igl urari quotidian dil pot a pei per la Val Tujetsch dapi 1859, entochen ch'els han pli tard era survegniu ina crotscha, ei il sequent: Naven digl emprem de zercladur entochen la fin de sett., mintga di; naven da Mustér parta el las 4 ed in quart ad arriva a Ruera las 7. — Naven digl emprem october entochen la fin de matg, cursescha el 4 dis ad jamna. Gie, quei onn serabetscha la posta schizun tochen Selva, treis gadas ad jamna stad ed unviern — mo gl'unviern vegn el strusch ad haver pudiu viden adina!?

La Lumnezia veva 1859 mo treis dis posta: mardis, gievia e sonda ed il curier mava quei di mo tochen Vella; gl'auter di tocca Vrin. — Sur de quei pign risguard, recloman ils Lumnezians detschartamein (v. N. Gas. Rom. nr. 45, 1859).

Quei medem onn ein ils sutuffecis de posta cun lur emploai vegni per part renovai ed augmentai. Per Mustér e contuorn ei vegni surdau la posta ad Augustin Condrau, per la Lumnezia ad Elvedi J. Cumbel, per Flem e contuorn a Rudolf L., per Glion a Buchli Martin e per Trun a Tambornino J.

Pertenent il manar la posta de cavals per la Surselva, ed ensumma quei che risguarda il niev urari ed uorden de cuorsas lateralas, dat la Romontscha, il sequent exact e prezis maletg: „Tenor decisiun dil cussegl federal han sequents personals de manar la posta de Surselva: de Rehanau a Glion, Sgr. capitani Caflisch, da Glion a Trun sgr. Stadtvoigt Oswald e da Trun a Mustér Sgr. ustier Tumaisch Berther. (Rem. digl autur: vegniu surschau alla finala — cuort sissu — davenda Glion a Mustér tut a Tumaisch Berther, quei probabel per motiv che Giohen Berther, fuya staus il davos pot de cumin q. v. d. cun cavagl de bast da Trun a Mustér. Notizia de sgra. Anna Disch, Mustér). Tenor il niev uorden sin Daniev 1858 va la posta sursilvana las 7 della damaun navenda Cuera, arriv'a Glion las 11 e 5 minutus, el madem temps arriva leu era la posta de Mustér, che semetta sin viadi las 8 della damaun. Allas 12 bandunan omisduas postas Glion e vegnen lura la madema ura a Cuera e Mustér, numnadamein las 3 e 55 minutus. Ils curiers de Lumnezia, dellas vischnauncas della Foppa e dil Cumin de Rueun, che schaian giud via, bandunan Glion da miez di; e quels de Tujetsch e Medel van la sera navenda Mustér; a Medel 3 ga per jamna, a Tujetsch 4 ga igl unviern e la stad mintgadi tochen Rueras. Quei niev cundrez satisfa compleinamein als basegns della Surselva; ord il pli allontanau cantun de quella san ins vegnir commodeivlamein en in di tochen Cuera, in ha temps de far giu leu de bia fatschentas, maungla far negin sforz per lavar marvegl e sa gl'auter di turnar ual schi commodeivlamein a casa. Las brevs della Cadi vegnen ussa era en in di ell'entira Lumnezia e Foppa, fertont ch'ellas ruassavan ora tochen decheu 1—3 dis el bureau de Glion. Ei aber inaga la via de fier en Surselva construida, sche vegn la posta de Cuera 3—4 gadas adi, ed in va lu en in di commodeivlamein giu e si — sch'in ha lur'eunc de far enzatgei a Cuera.“ (v. N. Gas. Rom. nr. 47, 1857.)

Il trafic Mustér-Cuera, para de haver tratg e fatg progress. Anno 1864 ha la posta stuiu metter neu ina bia pli gronda crotscha de posta, ina de 4 cavals; entochen uss fageva ina de dus. La consequenza ei denton stada, che quei hotel ambulont pudeva buc atras dapertut. Denter Tavanasa e Zignau per exempl, astgava la posta gronda entupar neginas menadiras, schiglioc riscavan ei de barrifar la via cumplettamein; de s'entupar senza sgreffels e giavels buc idea! Quei ha denton giu igl effect, che buca la biala crotscha de 4 cavals ha stuiu ceder, mobein la via. Il zercladur 1864 ha il Cussegl grond concludiu 34 000 frs. credit per slargiar quei toc via — e dapi lu eis ei ju sco unschiu!!

Denton ei la via nova naven da Mustér sur il cuolm d'Ursera vegnida baghegiada, 1858—1860, e scochemai stada finida, ei era quella tenda vegnida strapazada la stad dalla posta federala. Igli emprem mo ina gada a di cun dus cavals e lu 1873 ei gia in secund cuors vegnius arranschau — mo quei ei stau empau anzi baul! 1875 ha ei dau ina reacziun sin quella lingia, sco nus legin ord la Gas. Rom.: „A raschun ch'il secund curs postal de stad sur l'Alpsura rendeva bucca bia, e che negin sehanava fetg de surprender quel dal maun d'Uri, vegn quel bucca menaus en uonn. La posta va la stad mo inaga per di ad Ursera, da Cuera a Mustér e viceversa aber duas ga. Per la communicaziun locala della Surselva ei quella midada bucca disvantagiusa.“ (v. Gas. Rom., nr. 17, 1875)

Naven da 1875 entochen 1912, ha ei dau paucas midadas essenzialas pertenent la posta ed ils cuors della posta de cavals Cuera—Mustér. Quei bein: sigl ault della stad vesevan ins savens entiras roschas cavals, cun crotschas, carrs e bagaschas — che fagevan las singulas cuorsas perscretas — enqualga tochen 30—40 cavals, e quei fuva in bi mirarl Suenter de quei ch'ils Berthiers han calau de menar la posta de cavals (1903), han lur parents, ils Dischs de Mustér, e per temps era Giachen Antoni Werth-Vincenz, menau la posta da Glion tochen vi d'Ursera.

Tgei svilup e progress dapi il temps, ch'il vegli pot de cumin purtava aunc levamein la posta dell'entira Surselva en sia valischa si dies, e ch'el fuva obligaus ded ira mo ina gada per jamna giu tiels „Cruaruns“!  
Mo ussa aunc enzatgei pauc pertenent las tarifas de posta.

## Las tarifas de posta

### 1. Tariffa svizzera de brevs (1859)

#### Brevs

La taxa d'ina brev senza valur e buca recummandada, cuosta mintgamai tenor distanza dil liug al liug:

#### Circuit

I	II	III
Tochen	De 2as	Sur
duas	sin	10 uras
uras dis.	10 uras d.	distanza

		I	II	III
Peisa tochen sin . . . . .	1/2 loth	5	10	15
Peisa sur 1/2 loth tochen . . .	1 loth	10	15	20
Peisa ded 1 loth sin . . . . .	1 1/2 "	15	20	25
Peisa sur 1 1/2 " sin . . . . .	2 "	20	25	30
Peisa sur 2 " sin . . . . .	2 1/2 "	25	30	35
Ed aschia vinavon scadin miez loth depli 5 raps depli.				

## 2. Tarifa de posta per passagiers da Cuera a Mustér:

Domat 80 rps.; Rehanau fr. 1,30; Tumein fr. 1,40; Trin fr. 1,90; Flem 2,80; Laax 3,50; Schluuin 4 fr.; Glion 4,40; Strada 4,75; Rueun 5,10; Tavanasa 6,10; Zignau 6,65; Trun 6,80; Rabius 7,15; Sumvitg 7,45; Mustér 8,45. (v. N. Gas. Rom. nr. 1 1858)

1912 avon l'avertura della „Retica“ vegnev'ei generalmein perdegau, ch'il viadi da Cuera a Mustér vegni a vegrin „bia“ pli bienmarcau che la posta! Ins paregli oz ils prezis e seperschuadi de quellas empermischuns!?

## Posta — vias

En connex cun quest studi fuss ei bein stau pulit, sche nus havessen era el medem temps giu spazi e temps de descriver „l'historia dellas vias en Surselva“, della via vedra e nova.

Sur quei tema savess ins denton scriver in'autra gada cun temps e peda. Material dess ei cheu detguonda, schibein egl archiv dil cumin della Cadi, sco era enten las annalas della schurnalistica sursilvana (1836—), mo ina fontauna essenziala munglass ins aunc haver per quest studi e quella maunca oz aunc a nus. P. B. Berther, Dieus hagi si'olma, ha fatg attents mei pliras gadas, che Dr. C. Decurtins vevi schau rimnar naven da Cuera tochen Tschamut ils numbs locals e las indicaziuns exactas, nua che la via vedra mavi dapertut atras. El possedevi in entir triep carnets empleni cun indicaziuns detagliadas sur quella caussa fetg interessanta... Quei material ei buca vegnius en claustra cun la biblioteca dil prezau defunct, mo nus sperein fermamein, che quei custeivel material seigi aunc avon maun e ch'ins astgi far diever dad el ina gada.

Ed ussa vi jeu mo aunc menzionar, che dapi ils anno 60 tochen viden els 1870, han ils projects d'ina viafier internazionala, che dueva ir tras la Surselva enstagl tras il Munt Avelin, scaldua ils tgaus e la politica de nos Sursilvans. La finfinala — suenter de quei che ingenieur Lanicca veva gia stagiau ora la lingia manedlamein — eis ella buca vegrinida, e nus si sum Surselva havein stuii spitgar entochen 1912 sin la „Retica“.

Entras la vegrinida de quella ei la posta de cavals cun sia poesia romantica svanida, svanida per ina e peradina. Mo persuenter ha bunamein scadin tren

---

sia posta ed en vitgs pli gronds vegn il pot schizun duas gadas a di cun brevs e nuviallas tut in tener. Buca de dir, che nus essan vegni cheutras bia pli moderns (e gliez vala zatgei!), pretensius, e secapescha, bia pli ventireivels! (?)

Mo malgrad tut: viva il vegl pot de cumin! che leva mintga bieni si da mort en veta e che compara en parada festiva amiez il „rin“ dils umens de cumin!

---

## La canzun

*O sche conta  
giubilonta  
melodia, o sche conta!  
E ti casa  
sco la vasa  
dultsch' odur de flurs derasa!*

*Va per via,  
harmonia,  
e salida l' olma pia!  
Fai bellezia  
dai letezia,  
fai ch' ei ardi mo carezia!*

*Sche resuna,  
cara luna,  
e las olmas bein raduna!  
Cun faviala  
celestiala  
si tiel tschiel nus tuts empiala!*

*Leu domina  
bein perina,  
ti canzun, cun la Regina  
e cantina  
per adina  
per la Majestad divina!*

G. Btt. Sialm.